

## Tuzlanske Taversenove bajke: "Pelikanov sažetak GIKIL"



"Slučio se desaj" da jedan mali, tuzlanski poluseoski tužitelj-proserhatlić uhapsi prebogatog mlađeg brata beskrajno bogatog, među pet najvećih bjelosvjetskih tajkuna, starijeg brata, čije se bogatstvo zove, umjesto najobičnijom turbo-neoliberalnom pljačkom, uspješnim biznisom magnata na svjetskoj razini. Oprilike, njihova moć je poprilično srazmjerna milijardama dolara koje posjeduju ili je čak značajno i veća: tako funkcionira današnji "slobodni svijet".

Gorespomenuti tužitelj nije samo znamenit po lukavačkim Mittal-hapšenjima, on je, a sve po zakonskoj proceduri, nedavno pohapsio, pendrek mu se pozlatio, hrpu tuzlanskih "organiziranih kriminalaca" koji su unazad desetak godina smišljeno poubijali "nečinjenjem" osam-devet kupaca što stanova, što poslovnih prostora u zgradi "15. maj" na Brčanskoj Malti. Uz to, dvjestotinjak ljudi, naših sugrađana, su dali novac, tj. oko 10 miliona KM Javnom preduzeću u vlasništvu Grada, koje ih je kriminogenim mahinacijama i utaljenim lopovlukom "bijelih okovratnika" sa svojim kompanjonima "legalno" unesrećilo da su ostali, naravno bez para, ali i bez stanova i sl.

Međutim, šućur Allahu, pošto je dotični tužitelj, u narodu od milja već prozvan "Bič Božji", kao donedavno sitni komunalni gradski inspektor, navodno, službeno nadzorovao gradnju nesretne zgrade a time znao sve i najstnije detalje mučke prevare "15. maj", pod hitno je rukovodno-lokalne političare, hijene iz Javnog preduzeća i prida njihove kriminogene jatake smjestio "iza brave". I nije samo to, time je indirektno omogućeno da naknadno promptno Gradsko vijeće po kratkom postupku okonča ovu odvratnu agoniju, uz javno izvinjenje svojim građanima, preuzimajući odgovornost za nastalu aferu, tj. legalno finansijski i imovinski-pravno proceduralno okončavajući mučnu situaciju uvođenjem u posjed imovine poniženih i izvaranih Tuzlaka. Paralelno, logično je bilo i podnošenje direktnih krivičnih prijava bez izuzetka protiv svih upletenih u ovaj kriminal bez presedana u našem lijepom Gradu. Tako treba, napokon.

Naravno, hrpa dežurnih dušebrižnika i tračibaba što prije je potrčala da kaže kako je svrha hapšenje "mittalovaca" samo transstranački vrlo ozbiljan, očajnički indirektni pritisak na SDA, a i njene kantonalne Vlade, posebno onu koja je 2003.g. kreirala i potpisala inicijalni ugovor pri formiranju "GIKIL"-a, da odustane ili politički puferuje, definitivno razarajući, lokalizborni širokokoalicijski napad na onemoćalu "crvenu"

tuzlansku vlast. Da stvar bude još i gora, trabunjaju o kontekstualnoj komplementarnoj sprezi i konspirativnim urotama u korist Dodikovog koruptivnog "cijedejenja" Mittal-starijeg brata preko prodaje-preprodaje tehnološki ključnog ležišta željezne rude u Ljubiji u državnom većinskom vlasništvu RS-a.

A, svakako je "šlag na tortu" patološke gluposti, a i to je opcija, ustvrditi da je ukupna kaucija od sitnih 24 miliona KM za puštanje Pramoda Mittal-GIKIL-ovca da se brani "sa slobode", vjerovatno iz zakonske hladovine Londona ili Indije, samo kriminogeni "deal" nekih fantomskih osoba u vezi sa naplatom najmanje 160 miliona KM "sudskih potraživanja" baš tog istog ex-uhćenika preko leđa državne imovine lukavačkog posrnulog giganta. Doduše, i malo medijske magle po pljačkaškom skandalu mostarskog "Aluminija", ne mora biti naodmet: i Bošnjaci za lopovsku trku "konja imaju". Zašto uvijek zaostajati za europskim HDZ vrednotama ?! Zašto, kada smo "svoji na svome".

Do novih državotvornih hapšenja, avanti diletanti. (Piše: Derviš ČIČKO)

Date: 30-07-2019